



UPA 2014- 37 & 104  
08.05. 2014  
Aqqaluaq B. Egede

**Qaanaami, Illoqqortoormiuni, Taasilami taakkualu nunaqarfiini nannunik aarrinik qilalukkanillu piniarnerup killilersorneqarunnaarsinnaanera, nunatta nunanik allanik isumaqatigiissutaasa pisussaaffiliinerisa iluani, periarfissaanersoq misissoqqullugu Naalakkersuisut peqquneqarnissaannik Inatsisartut aalajangiiffigisassaattut siunnersuut.**

(Inatsisartunut ilaasortaq Lars Mathæussen, Siumut)

Umassusilinnik pisuussutitsinnik avammut nioqquteqarnerneq sulii ukiorpas-suarni tulliuuttuni pingaarnepaajulluni Nunatsinnut isertitsitsissutaasussaavoq. Taamaattumik ummassusilinnik pisuussutitta iluaqutiginiarneri ilisimatuus-sutsikkut paasisat, innuttaasut ilisimasatoqaat aammalu nunanut allanut isumaqatigissutinik eqquutsitsineq tunngavigalugit piujuartitsisumik aqun-neqarnissaat Inuit Ataqatigiit qitiusutut pingaartitaraat. Ilisimavarputtaaq nunatsinnit Issittumilu inuiannit allanit ummassusilinnik iluaquteqarniarneq nunat tamalaat akornanni akornusersorniarneqartuartoq, ilaatigut puisit arferillu eqqarsaatigalugit.

Inuit Ataqatigiit ajornartorsiummut tassunga suleriaasissaat tassaavoq, pisuus-sutinik sumiiffinni nunatta pigisaaniittunik iluaquteqarniarnissatsinnut pisinnaa-titaaffivut sorsuutigiuassagatsigit aammalu taamatut iluaquteqarnitsinni sapin-gisamik annertunerpaamik piujuartitsinermik tunngaveqarluni ingerlatsiso-qarnissaa qulakkeerniassagipput. Peqatigisaanik pingaartipparput, nunarsuar-mioqatitsinnut paasitinniarsarissagatsigu allaanerusumik pinngortitaqarlutalu inooriaaseqaratta, aammalu inuiattut pisinnaatitaaffigipput taamatut inooriaa-seqarnitsinnik attassiinnarnissarput aammalu piniarnermik inuutissarsiute-qarnitsinnik ineriartortitsisinnaanissarput, aamma aningaasaqarniarnikkut. Inuit Ataqatigiit pimoorussamik anguniagarivaat, nerisassanik immitsinnut pilersor-nerunissarput, tamatumanilu nunanik allanik suleqateqarneq pinngortitatsinnillu aqutseriaaserput pingaarutilimmik inissisimapput.

Nunalerineq uumasuuteqarnerlu, piniarneq aalisarnerlu peqatigalugit ineriartor-tinneqassapput immitsinnut pilersorsinnaaneq avammullu tunisassiorneq siunertaralugit. Pinngortitamut ataqatigiissakkamik aqutseriaaseq inerisar-neqassaaq, aamma sumiiffinni najugallit atuisullu ilisimasaat pissuussutivut ummassusillit pillugit aqutsisoqarfinni ilisimatusarfinnilu ingerlatanut ilaatinne-qartarnerat nanginneqassaaq.

Taamatullu oqaaseqarluta Inatsisartunut ilaasortap Lars Mathæussen-ip siunnersuutaa ilalernartuutinngikkipput nalunaarutigaa.

**Kitaani ukiukkut aaffanniartarnerup januarip 15-iat aallarnerfigalugu martsip 15-iat ilanngullugu ingerlanneqartartussanngorlugu Naalakkersuisut Aavernik illersuineq piniarnerlu pillugit Namminersorne-**

**rullutik Oqartussat nalunaarutaat nr. 20, 27. oktober 2006-imeersoq-p allanngortinneqarnissaannik peqquneqarnissaannik Inatsisartut aalajangiiffigisassatut siunnersuut.**

(Inatsisartunut ilaasorta q Nikolaj Jerimiassen, Siumut)

Pisuussutivut uumassusillit nunatsinni aqutamik pissutsillu qanoq ilinerannut naleqqussartuarlugit aqunneqassappata, siullertut oqartussaasut akisussaasullu tassaapput Naalakkersuisut. Inuit Ataqtigiit apeqquserparput, pisassiissutinik aqutsineq aamma oqartussaaneq akisussaasuunerlu naalakkersuisoqarfanni ilumut inissisimatiinnassallugit pissusissamisoornersoq.

Piniagassat uumasullu assigiinngitsut qaqugukkut piniagaanissaannik piffisaliisarneq, aamma aalisakkanik pisassiiniartarnermi pissusiviusunik aallaveqarnissarput Naalakkersuisut qulakkeerniagassaraat. Pisassiissutinik annertusisiliisarneq, qaqugukkullu piniagassat piniarneqarsinnaatitaanissaannik aalajangiisartut tassaapput Naalakkersuisut. Ukiunili kingullerni ersarissigaluttuinnarpoq Inatsisartunut ilaasortat pisassiissutinik piniagassallu qaqugukkut piniarneqarnissaannik piffissalersuinerit Inatsisartut ataatsimiinneranni siunnersuusiornikkut aqutsineq tigujartorpaat.

Pissutsit taamaalilernerat eqqarsalersitsivoq, ilumut Naalakkersuisoqarfiup pisassiissutinik aammalu piniagassat qaqugukkut piniarneqarnissaannik aalajangersaanissaminnut pissusiviusunik malinnaanissaminnut nukissaqarnerisut. Siunnersuut una saqqummiunneqartoq akerlilersunngilarput. Uanili apeqqusigarput tassaavoq ilumut aalisarnermut Naalakkersuisoqarfiup ulluinnarni aqutsisussatut inissisimaannarnissaminut tulluurtuunersoq apeqquseratsigu.

Inatsisartummi aalajangiiffigisassatut siunnersuutigisartagaat arlallit akuerineqarnerisigut pisassiissutit pinigassallu qaqugukkut piniagaasarnissaannik allannguisarnerit pisarput. Inuit Ataqtigiit isumaqarpugut pisassiissutit piniagassallu qaqugukkut piniarneqarnissaannik piffisaliisarneq suleriaaseq malillugu aamma oqartussaaffiit Inatsisatuni inissisimasut, Naalakkersuisullu oqartussaaffigisaat apeqqummi matumani akulerusimavallaalersut.

Assersuutigalugu siunnersuut una naalakkersuisut siullertut ilisimasaqarfigisatik tunngavigalugit ilisimasariaqaraluarpaat. Inuiaqtigiilli naalakkersuinikkut aqunneqarneranni naliginnaaleriartuinnarpoq Inatsisartuni aalajangiiffigisassatut siunnersuusiornikkut naalakkersuisoqarfiup akisussaaffigisaai naalakkersuisoqarfiit qarsutiinnarlugit Inatsisartuni aalajangiiffigisassanngortarnerat. Tamanna eqqarsaatigeqqitassatut Inuit Ataqtigiinniit kajumissaarutigaarput.

Taamatut oqaaseqarluta Inuit Ataqtigiit siunnersuut itigartinneqassasoq inassutigissavarput. Naalakkersuisulli isumaqatigaagut oqarmata KNAPK aammalu piniartut peqatigalugit oqaloqtigiinnerit aallarnisarniarmatigit aammalu kaammattuutigissavarput Inatsisartut Aalisarnermut ataatsimiititaliaat tamatumani malinnaatinneqassasoq.